

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 33/2

15 նոյեմբերի 2016թ.

Քննարկվեց Թագուհի Մկրտչյանի գանգատը ՀՀ ԿԱ ՊԵԿ աշխատակազմի իրավաբանական վարչության պետի 25.08.2016թ. թիվ 618/09 որոշման դեմ:

Թագուհի Մկրտչյանի գանգատում բերված փաստարկները.

2016թ. օգոստոսի 25-ին ՀՀ պետական եկամուտների կոմիտեի կողմից կայացվել է հարկ վճարողից ժամանակին չվճարված հարկային պարտականությունների գծով վճարման ենթակա գումարը գանձելու մասին որոշում:

Համաձայն որոշման, Թագուհի Մկրտչյանը (ՀՎՀՀ 66839072) ունի չվճարված հարկային պարտավորություններ, որը կազմում է 106.606 ՀՀ դրամ:

Նշված գումարից պարգեցված հարկի գծով պարտավորությունը կազմում է 59.185 ՀՀ դրամ, ապառք՝ 35.114 ՀՀ դրամ, տույժ 24.071 դրամ, որն առաջացել է 2005թ. երկրորդ և երրորդ եռամսյակի համար:

Սոցիալական ապահովության վճարի գծով պարտավորությունը՝ 47.421 ՀՀ դրամ, որից ապառք՝ 24000 ՀՀ դրամ, տույժ՝ 23.421 ՀՀ դրամ, որն առաջացել է 2005թ. սեպտեմբերից դեկտեմբեր ժամանակահատվածում:

2006թ. ապրիլի 3-ին Թագուհի Մկրտչյանի կողմից դիմում է ներկայացվել ՀՀ ԿԱ ՀՊԾ Վանաձորի հարկային տեսչություն՝ գործունեությունը ժամանակավոր դադարեցնելու և պետական գրանցման վկայականը ժամանակավորապես հանձնելու վերաբերյալ:

Նշված դիմումը ներկայացնելիս հարկային ծառայության աշխատակիցները չեն հայտնել, որ առկա են չկատարված պարտավորություններ: Նշած պարտավորությունների մասին Թագուհի Մկրտչյանին հայտնել են դրանք առաջանալուց հետո 11 տարի անց, որին գումարվել են նաև այդ տարիների համար տույժերը, ինչի վճարումը մատչելի չէ: Բացի այդ, հարկային մարմինները գործունեությունը դադարեցնելուց առաջ տեղյակ են եղել այն մասին, որ իր կողմից գործունեություն չի ծավալվել:

Այն մասին, որ Թագուհի Մկրտչյանի կողմից չեն կատարվել 2005 թվականի երկու եռամսյակների պարգեցված հարկի գծով պարտավորությունները հարկային համապատասխան մարմինները կարող էին իմանալ ավելի վաղ, մինչև 2006թ. ապրիլը՝ այն պահը, երբ իր կողմից գործունեության դադարեցման մասին դիմում է ներկայացվել, սակայն այն չի արվել, նպատակ ունենալով հետագայում տույժերի հաշվարկմամբ գումարը գանձել: Եթե չվճարված պարտավորության մասին ծանուցվեր այն կատարելուց անմիջապես հետո, ապա մայր գումարը վճարելը կլիներ ավելի հեշտ: Այնինչ, չվճարված պարտավորությունների մասին համապատասխան ծանուցում է ստացվել ենթադրյալ պարտավորությունը չկատարելուց 11 տարի անց, ինչն էլ անբարենպաստ պայմաններ է ստեղծում:

Ելնելով վերը նշվածից՝ Թագուհի Մկրտչյանը խնդրում է վերացնել ՀՀ ԿԱ ՊԵԿ իրավաբանական վարչության 25.08.2016թ. թիվ 618/09 որոշումը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ աշխատակազմի իրավաբանական վարչության պետը, քննարկելով Թագուհի Մկրտչյանի վերաբերյալ վարչական վարույթի նյութերը պարզել է, որ համաձայն հարկային մարմնում առկա անձնական հաշվի քարտի տվյալների 11.08.2016թ. դրությամբ նրա չկատարված հարկային պարտավորությունները կազմում են 106.606 դրամ:

Պարզեցված հարկի գծով պարտավորությունը կազմում է 59.185 դրամ, որից ապառք 35.114 դրամ, տույժ 24.071 դրամ, որն առաջացել է 2005թ. 2-րդ և 3-րդ եռամսյակների համար ներկայացված հաշվարկներով:

Սոցիալական ապահովության վճարի գծով պարտավորությունը կազմում է 47.421 դրամ, որից ապառք 24000 դրամ, տույժ 23.421 դրամ, որն առաջացել է 2005թ. սեպտեմբերից դեկտեմբեր ամիսների կանխավճարային գումարներից:

Արդյունքում, ղեկավարվելով «Հարկերի մասին» ՀՀ օրենքի 29.1 հոդվածի և «Վարչարարության հիմունքների և վարչական վարույթի մասին» ՀՀ օրենքի 55-րդ, 56-րդ, 58-րդ, 88-րդ հոդվածների դրույթներով ՀՀ ԿԱ ՊԵԿ աշխատակազմի իրավաբանական վարչության պետի կողմից 25.08.2016թ-ին ընդունվել է թիվ 618/09 որոշումը (այսուհետ նաև՝ Որոշում) Թագուհի Մկրտչյանից 106.606 դրամ պարտավորության գումար գանձելու մասին:

Քննարկման ընթացքում օպարզվեց, որ Թագուհի Մկրտչյանի կողմից 03.04.2006թ. Վանաձորի ՏՀՏ ներկայացվել է դիմում՝ գործունեությունը ժամանակավոր դադարեցնելու և պետական գրանցման վկայականը ժամանակավորապես հանձնելու մասին:

Տվյալ դեպքում Որոշմամբ պարզեցված հարկի գծով գանձման առաջադրված պարտավորությունը՝ գումարով 59.185 դրամ, առաջացել է Թագուհի Մկրտչյանի կողմից 2005թ. 2-րդ և 3-րդ եռամսյակների համար ներկայացված հաշվարկներով, իսկ սոցիալական ապահովության վճարի գծով պարտավորությունը՝ գումարով 47.421 դրամ, 2005թ. սեպտեմբերից դեկտեմբեր ամիսների կանխավճարային գումարներից: Այսինքն, Որոշմամբ գանձման առաջադրված պարտավորություններն առաջացել են մինչև գործունեությունը ժամանակավոր դադարեցնելու և պետական գրանցման վկայականը ժամանակավորապես հանձնելու մասին դիմում ներկայացնելը: Հետևապես, նշված պարտավորությունները հիմնավոր են և ենթակա են կատարման:

Ինչ վերաբերվում է գանգատում բերված այն պնդմանը, որ վերոգրյալ դիմումը ներկայացնելիս Թագուհի Մկրտչյանին չի տեղեկացվել պարտավորությունների առկայության վերաբերյալ, ապա այդ կապակցությամբ հարկ է նշել, որ «Հարկերի մասին» ՀՀ օրենքի 22-րդ հոդվածի համաձայն՝ հարկերը ճիշտ հաշվարկելու, ժամանակին վճարելու և հարկային օրենսդրության մյուս պահանջները պահպանելու պատասխանատվությունը, հարկային օրենսդրությամբ այլ բան սահմանված չլինելու դեպքում, կրում են հարկ վճարողները և դրանց (ձեռնարկությունների, հիմնարկների և կազմակերպությունների)՝ ՀՀ օրենսդրությամբ սահմանված պաշտոնատար անձինք:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

ՀՀ ԿԱ ՊԵԿ աշխատակազմի իրավաբանական վարչության պետի 25.08.2016թ. թիվ 618/09 որոշումը թողնել անփոփոխ, իսկ գանգատը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝



Վ.ՄԻՐՈՒՄՅԱՆ